

La cunvigne di Gurize e Udin e à ricuardât la sô opare

Graziadio Isaia Ascoli

pari dai studis ladins

Un scandai su dute la opare di Graziadio Isaia Ascoli: chest al è stât il risultât de cunvigne che si è davuelzude a Gurize e a Udin inte setemane stade, dai 3 ai 5 di Mai, inmaneade de Societât Filologjiche Furlane, parie cul Centri Internazionâl sul Plurilinghisim de Universitât dal Friûl, cul Comun di Gurize e cul Istitût pai Incuintris Culturâi Miteuropeans, simpri di Gurize.

La impuartance de iniziative, dal titul *Il pensiero di Graziadio Isaia Ascoli a cent'anni dalla scomparsa (Il pînsîr di Graziadio Isaia Ascoli a cent agns de muart)* e je stade une vore grande par tantis reons. Prin di dut, la sielte di Gurize, la citât indulà che Ascoli al è nassût – dal 1829 – e indulà che si è formât di bessòl, prime di diventâ chel grant e preseât studiôs che ducj a cognossin.

Dut câs, la robe plui interessante e je il fat che cheste cunvigne, une des trê che a son stadis inmaneadis par ricuardâ i cent agns de muart dal nestri, e à fevelât di dute la ativitât científiche di Ascoli, de tratazion metodologjiche de storie des religjions al so rûl di grant intelektuâl inte Italie dal Risorziment, de sô opare lenghistiche ai contribuîts al stu-

di des lenghis ladinis. Dutis lis sessions, sedi chês di Gurize sedi chês di Udin, a son stadis vivarosis cuntune buine partecipazion di studiôs di dute Europe.

La Filologjiche che, o ri-



Graziadio Isaia Ascoli

cuardìn, e je intitulade propit a Graziadio Isaia Ascoli e à intindût cjapâ ativamente part ae cunvigne tant che ent promotôr de manifestazion.

La sede udinese di Palaç Mantica e à ospitât, intal daspomisdi di vinars 4, une session indulà che si è fevelât dal Ascoli ladinist, tant che

autôr di chei *Saçs ladins* che a ricognossin dignitât e autonomie aes fevelis di cheste famee, e duncje ancje al furlan. Tal stes cantin al è stât ancje presentât, par cure dal prof. Bruni de Universitât di Vignesie, un impuartant volum rincurât di Carla Marcato e di Federico Vicario, dal titul *Scritti scelti di linguistica italiana e friulana*, che al met adun i miôr saçs dal Ascoli, come il *Proemi* dal numar di scree de riviste científiche che al fondà, l'Archivio Glottologico Italiano, e altris fundamentâi contribuîts di lenghistiche e ladinistiche, che a son cussi a disposizion di cui che al vûl svinçinâsi ae cognossince dal so pînsîr. Il libri al è stât editât de Filologjiche cul jutori de Fondazione de Casse di Sparagn di Gurize.

«Il belanç de cunvigne – e comente la Prof.re Carla Marcato, curadore de iniziative – al è une vore bon e impuartant. Prin di dut pe partecipazion di cetancj studiôs dal Ascoli in ducj i cantins indulà che chest grant om al à pandude la sô sience. Cun di gracie aes impuartantis relazioni, comunicacions e interventi la cunvigne e je stade une vore vivarose e plene di significât par riscuvierzi a distance di cent agns de muart, la opare dal Ascoli».